

**Qamutit motorillit akileraarutaat pillugit Inatsisartut inatsisissaanni ATV-nut akitsuut ukiumut ataasiaannartumik akiligassanngoqqullugu, akitsuutillu 50 pct-mik appartinneqarnissaanut Naalakkersuisut UKA2019-imut inatsimmut allannguutissatut siunnersuusioqqullugit peqquneqarnissaannik Inatsisartut aalajangiiffissaattut siunnersuut.**

(Inatsisartunut ilaasortaq Stine Egede, Inuit Ataqatigiit)

### **Akissuteqaat**

(Aningaasaqarnermut Nunanilu Avannarlerni suleqatigiinnermut Naalakkersuisoq)

### **Siullermeerneqarnera**

Qamutit motorillit aqqusinerni, illoqannginnersani sumiiffinnilu allani nalinginnaasumik aqqusinikkut angallannermi atorpeqartut, aqqusinikkut angallannermut inatsit naapertorlugu qamutit aqqusinerni angallannermut inatsisip atuuffissaanni atorneqalinnginneranni nalunaarsorneqartussaapput aammalu nummerpladelerneqartussaallutik. Tamanna aamma qamutininut illoqarfiup nunaqarfiullu avataanni atorneqartartunut atuuppoq, ilanngullugit assersuutigalugu savaateqarfinni assigisaannilu.

Aqqusinerni angallannermut inatsimmi maleruagassat naapertorlugit qamutininut piginnittoq imaluunniit ataavartumik atuisussaq aammattaaq qamutit akisussaasuunermut sillimmasernissaannik pisussaaffeqarpoq. Politiit aqqusinerni angallannermut inatsit atuutsittussaavaat aammalu qamutit nalunaarsorsimanersut misissortussaallugu.

Qamutit motorillit Akileraartarnermut Aqutsisoqarfimmut motorinut akitsuut akilerneqareerpat aatsaat nalunaarsorneqartussaapput. Ullumikkut qamutininut motorilinnut sisamanik assakaasulinnut nalinginnaasunut akigititat malillugit akitsuusiisoqartarpoq. Akitsuut 6.554 koruuniuvoq.

Ilisimaneqartutut Inatsisartut ataatsimiinneranni matumani qamutit motorillit akileraarutaat pillugit inatsisissatut siunnersuut saqqummiunneqartoq Naalakkersuisunit tunuartinneqarpoq. Qamutininut nunakkoortaatitut sisamanik amerlanernilluunniit assakaasulinnut akitsuut

atorunnaarsinneqassasoq Aningaasaqarnermut Ataatsimiititaliami amerlanerussuteqartunit nalilerneqartoq ataatsimiititaliap siunnersuutit pillugit isumaliutissiissutaani allassimavoq.

Ataatsimiititaliamit oqaatigineqartut tunngavigalugit suliassaqaqfimmi akitsuutitut periutsimik ilusilersuinissamik suliap aallartinneqassasoq Naalakkersuisunit siunniunneqarpoq, taamaalilluni qamutit motorillit assigiinngitsut avatangiisinut mingutsitsinerat isiginiarneqarnerussalluni, soorluttaaq qamutitik motorilinnik piginnittut qamutit motorillit nalunaarsorneqartussaataasut nalunaarsorneqarnissaat aammalu malittarisassat malillugit sillimaserneqarnissaat pillugu ilisimasaqarnerulernissaat anguniarlugu qanoq iliuuseqartoqarsinnaanersoq ilanngullugu isumaliutigineqassasoq. Qamutitik motorilinnik piginnittut qamutiminnik motorilinnik nalunaarsuinissamik sillimasiinissamillu kajumissuseqarnerat annertusarniarlugu akitsuutit atuutsitsilernissap isumaliutigineqarsinnaanera pillugu pissutsit taakku ataatsimoortillugit nalilerneqarnissaat naapertuuttutut isigineqarpoq.

Tamanna tunngavigalugu qamutitut motorilinnut allanullu akitsuutitut periussamik nutaamik ilusilersuinermik suliap inernerata utaqqimaarneqarnissaa pitsaanerussasoq Naalakkersuisut isumaqarput. Aalajangiiffigisassatut siunnersuutip matuma oqaluuserineqarneranut atatillugu isummat saqqummiunneqartut aammalu inatsisissatut siunnersuutit marluk tunuartinneqartut oqaluuserineqarnerannut atatillugu saqqummiunneqartut suliapi tamatumani soorunami pingaartillugit ilaatinneqassapput.

Taamatut oqaaseqarlutik aalajangiiffigisassatut siunnersuut itigartinneqassasoq Naalakkersuisut inassutigaat.